

四庫全書

史部

欽定四庫全書

欽定續通典卷一百十五

刑

守正

唐

五代

宋

遼

金

元

明

唐肅宗至德二年將軍王去榮以私怨殺本縣令當死
帝以其善用礮勅免死以白衣於陝郡効力中書舍人
賈至持詔不即行上表言去榮無狀殺本縣令而議者
謂陝郡初復非其人不可守然則他無去榮者何以亦

能堅守乎若以能用礮石即免誅死今諸軍技藝絕倫者其徒實繁必恃其能所在犯法又將何以止之太子太師韋見素等亦以為於律殺本縣令列於十惡而陛下寬之王法不行人倫道屈臣等奉詔不知所從願陛

下守貞觀之法

按去榮犯法律有應坐之條乃肅宗以礮石微長真兇惡於不問僅予褫奪竟

免刑誅未始非召亂啟奸之漸賈至韋見素等執法論情所言平允雖未見從而議不可沒故特載之德

宗時郭子儀壻太僕卿趙縱為奴告下御史劾治奴留內侍省宰相張鑑言貞觀時有奴告主反者太宗曰謀

反理不獨成當有他人覺發何藉奴告乃著令奴告主者斬由是賤不得干貴下不得凌上教本修而悖亂不作頃者長安令李濟以奴得罪萬年令霍晏因婢坐譴遂使輿臺下類主反畏之悖慢成風漸不可長建中元年詔書奴婢告主非謀叛者同自首法令縱事非叛逆而奴留禁中縱獨下獄情所不厭帝納之貶縱官奴杖死竇參為大理司直婺州刺史鄧珽坐贓八十貫珽與執政有舊以會赦欲免徵贓詔百僚雜議多希執政旨

參獨堅執玳竟伏法徵賊杜亞為東都留守盜劫輸絹于洛城北亞惡大將令孤運適運與其部下畋北郊亞意其為盜執訊之連繫者四十餘人亞將逞其宿怒且以得賊為功上表指明運盜之狀帝信而不疑宰臣以獄大宜審奏請覆治命侍御史李元素就鞠亞迎路以獄成告元素驗之五日盡釋其囚而還亞大驚且怒親追送馬上責之元素不答亞遂上疏誣搆元素及復命言未畢帝怒曰出俟命曰臣未盡詞帝又曰且去曰臣

一出不得復見陛下乞容盡詞帝意稍緩乃備述運寬
狀帝始悟後數月果得真盜京兆尹李充有美政裴延
齡惡之誣劾充比陸贄數遺金帛當抵罪又乾沒京兆
錢六十八萬緡請付比部鉤校時郎中崔元翰怨贄揣
延齡指逮繫榜掠甚急內以險文刑部侍郎奚陟持平
無所上下且言京兆錢給縣館傳餘以度支符用度畧
盡充既免元翰不得意以恚死憲宗朝江西觀察使裴
堪奏虔州刺史李將順贓狀朝廷不覆按遽貶將順道

州司戶尚書左丞呂元膺封還詔書奏曰縱堪辭足信亦不可為天下法請發御史按問宰臣不能奪宣徽五坊小使方秋閔鷹狗所過撓官司厚得餉謝乃去下邳令裴寰不為禮因構寰出醜言送詔獄當大不恭宰相武元衡婉辭諍帝怒未置御史中丞裴度見延英帝恚曰寰誠無罪杖小使小使無罪且杖寰度曰責若此固宜第寰為令惜陛下百姓安可罪帝色霽乃釋寰神策軍自興元後日驕恣府縣不能制軍吏李昱貸富人錢

八百萬三歲不肯歸京兆尹許孟容遣吏捕詰與之期使償曰不如期且死一軍盡驚訴於朝詔以昱付軍治之再遣使皆不聽奏曰不奉詔臣當誅然臣職司輦轂當為陛下抑豪強錢未盡輸昱不可得帝嘉其守正許之京師豪右大震浮屠鑒虛者自貞元中關通賂遺倚宦豎為姦會坐于頓杜黃裳家事逮捕下獄御史中丞薛存誠窮劾之得贓數十萬當以大辟權近更保救於帝有詔釋之存誠不聽明日詔使詣臺諭曰朕須此囚

面詰非赦也存誠奏曰獄已具陛下必欲召赦之請先
殺臣乃可不然臣不敢奉詔鑒虛卒抵死穆宗長慶中
裴潯為刑部郎中有前率府倉曹曲元衡杖殺百姓栢
公成母法官以公成母死在辜外元衡以父蔭當贖罪
徵銅公成私受元衡資貨母死不聞公府理官亦以經
恩免罪潯議曰典刑者公栢也在官得施於部屬之內
元衡身非在官公成母非部屬而擅憑威力橫此殘虐
豈合拘於常典公成取貨於讐利母之死悖逆天性尤

所必誅奏上勅元衡杖六十配流公成論死宿州刺史
李直臣坐贓當死賂中人為之援解御史中丞牛僧孺
堅執不回帝面諭之曰直臣事雖憊失然有經度才可
委之邊任朕欲貸其死何如僧孺曰凡人不才止於持
祿取容耳帝王之法束縛姦雄正為才多者祿山朱泚
以才過人濁亂天下況直臣小才何為屈法哉上嘉納
之文宗太和五年鄭注搆宗申錫獄捕逮倉卒事由內
出無可證驗右散騎常侍崔元亮率諫官叩延英苦諍

反覆數百言帝未諭元亮置笏在陛曰孟軻有言衆人皆曰殺之未可也卿大夫皆曰殺之未可也天下皆曰殺之然後察之乃寘於法今殺一凡庶當稽典律況欲誅宰相乎臣為陛下惜天下法不為申錫言也俯伏流涕會大理卿王正雅與京兆尹崔瑗亦上疏言宜得告事者考驗其辭狀以聞注等憚之由是獄稍解六年濮州掾崔元武受吏贓又率屬邑奉錢增私馬估售官疊三罪計絹百二十疋大理斷三犯以重者論抵入私馬

為重止削三官刑部覆訊當流未決天平節度使殷侑
奏三犯不同坐所重準律枉法十五匹已上絞頻犯者
累科元武犯皆枉法當死詔如部議元武決杖流賀州
帝嘉侑守法進刑部尚書武宗會昌中澤潞平朝議以
劉從諫妻裴氏為裴問之妹欲原之初從諫死積叛裴
以酒食會潞州將校妻子泣告以固逆謀法司請從重
典刑部侍郎劉三復復奏曰從諫包藏禍心蹟狀顯著
人臣叛逆合有三族之誅阿裴已不得免於極法又況

從諫死後主張狂謀罪狀非一稔年幼小逆節未深裴
為母氏宜誘說忠孝之道開陳禍福之原而乃激厲兇
黨膠固叛心廣招將校之妻儼開酒食之晏號哭以激
衆意贈解以結羣情遂使叛黨稽不捨之誅孽童延必
死之命以至周歲方就刑誅此阿裴之罪也雖以裴問
之功或希減罪而國家有法難議從輕夫管叔周公親
弟也有罪則除以周公之賢尚不赦兄弟之罪況裴問
功效安能破朝廷之法耶據阿裴廢臣妾之道懷逆亂

之謀裴問如周公之功尚合行周公之戮況於朝典固在不疑阿裴乞準法從之宣宗大中中韋澳為京兆尹帝舅鄭光主壻吏豪肆積年不輸官賦澳逮繫之他日帝問其故澳具道姦狀且言必寘之法帝曰可貸否對曰陛下自內署擢臣尹京邑安可使畫一法獨行於貧下乎帝入白太后曰是不可犯后為輸租乃免

後唐明宗時汴州倉吏七十二人定贓應死分戮於三市史彥弼為汴州牙校舊將之子石敬瑭之戚屬王建

立奏希免死帝曰王法無親豈可私徇乃皆就戮呂琦
為駕部員外郎兼侍御史知雜事河陽主藏吏盜所監
物下軍巡獄吏尹訓納賂反其獄其家訴於朝下御
史臺按驗得訓贓狀奏攝訓赴臺訓為安重誨所庇不
與琦請不已訓懼自殺獄乃辨蒙活者甚衆

晉開運初張仁愿再為大理卿開州刺史王澈犯贓朝
廷以澈功臣子欲宥之仁愿累執奏不移竟伏法

宋太祖朝馬仁瑀為瀛州防禦使兄之子因醉誤殺平

民繫獄當死民家自言非有憾也過誤爾願以過失傷
論仁瑀曰我為長吏而兄子殺人此乃恃吾勢橫恣耳
非過失也豈可以已之親而亂國法哉卒論如律淳化
中張詠知銀臺封駁司張永德為并州帥有小校犯法
笞之至死詔按其罪詠封還詔書且言陛下方委永德
邊任若以一部校故摧辱主帥臣恐下陵上自此始太
宗不從未幾果有營卒脅訴軍校者詠復引前事為言
太宗乃改容勞之澶淵之役諸將臨敵退衄真宗已詔

貸罪議者以為敗軍之將當誅帝惑以問殿前都指揮使高瓊對曰罪誠當誅然陛下去歲已釋其罪今復行之非信也又方屯諸路非時代易臣恐衆心疑懼乃止違制之法向無故失率坐徒二年王曾知審刑院請分故失非親被制書者止以失論帝不悅曰如是不復有違制者曾曰如陛下言亦無復有失者矣自是違制遂分景德中榮王宮火延前殿有言非天災請置獄劾火事當坐死者百餘人宰相王旦獨請見曰始失火時陛

下以罪已詔天下而臣等皆上章待罪今反歸咎於人
何以示信且火雖有跡寧知非天譴耶帝從之當坐者
皆免王質知廬州日有盜殺其徒而并其財者獲之置
於法大理駁曰法當原質謂盜殺其徒而自首者原之
所以疑壞其黨而開其自新若殺而不首既獲而又原
則公行為盜而第殺一人既得兼其財又可以贖罪不
獲則肆為盜獲則引以自原如此盜不可止非法意也
疏三上貶監靈仙宮仁宗時近臣有罪多不下吏劾實

不付有司議法諫官王贇言情有輕重理分故失而一切出於聖斷前後差異有傷政體刑法之官安所用哉請自今悉付有司正以法詔可沈德妃之弟惟恭樂安郡主之壻張承衍同管勾會靈觀觀燔黜惟恭蔡州承衍汝州妃主交為言乞留京師帝曰已行之命為貴戚所回則法徒設矣命趣行周敦頤為南安司理參軍有囚法不當死而轉運使欲深治之敦頤爭不勝投其告身以去曰如此尚可仕乎殺人以媚人吾不為也轉運

使感悟囚卒不死神宗以韓晉卿為大理正晉卿自仁
宗朝已典訟臬時朝廷有疑議輒下公卿雜議開封民
爭鶡殺人王安石以為盜拒捕鬪而死殺之無罪晉卿
曰是鬪殺也登州婦人謀殺夫郡守許遵執為按問安
石復主之晉卿曰當死事久不決爭論盈廷終持之不
肯變故事大理開封斷獄得請實蔽罪其後任情棄法
法益不用哲宗時開封少尹虞奕言廷尉持天下平京
師諸夏本法且不行何以示萬國請自今非情法實不

欽定四庫全書

御批歷代通鑑輯覽
卷一百十五

相當毋得輒請從之高宗紹興初張九成為鎮東軍僉判民冒嵯禁提刑張宗臣欲逮捕數十人九成爭之宗臣曰此事左相封來九成曰主上屢下恤刑之詔公不體聖意而觀望宰相耶宗臣怒九成即投檄歸孝宗時李浩知台州豪民鄭憲以貲給事權門囊橐為姦事覺械繫之死獄中盡籍其家徙其妻孥權貴人教其家訟寃且誣浩以買妾事言者用是擠之疏方上權參政劉珙越次奏曰李浩為郡獲罪豪民為其所誣臣考其本

未甚白帝顧曰守臣不畏彊禦豈易得耶且問章安在
珙袖出之遂留中不下大理觀望猶欲還憲所沒貲帝
批其後曰台州所斷至甚允當鄭憲家貲永不給還流
徙如故明年大理奏結他獄帝顧輔臣曰棘寺官須得
剛正如李浩者為之已而卿缺曰無以易浩遂除之程
迴知隆興府進賢縣省符下知平江府王佐決陳長年
輒私賣田其從子愬有司十有八年母魚氏年七十坐
獄廷辨按法追正令候母死服闋日理為已分令天下

郡縣視此為法迴為議曰天下之人孰無母慈子若孫
宜定省溫清不宜有私財也在律別籍者有禁異財者
有禁當報牒之初縣令杖而遣之使聽命於其母可矣
何稽滯徧愬有司而達於登聞院乎春秋穀梁傳注曰
臣無訟君之道為衛侯鄭與元咺發論也夫諸侯之於
命大夫猶若此子孫之於母乃使坐獄以對吏愛其親
者聞之不覺泣涕之橫集也按令文分財產謂祖父母
父母服闋已前所有者然則母在子孫不得有私財借

使其母一朝盡費其子孫亦不得違教令也既使歸於其母其日前所費乃卑幼輒用尊長物法須五年尊長告乃為理何至豫期母死又開他日爭訟之端也抑亦安知不令之子孫不死於母之前乎守令者民之師帥政教之所由出誠宜正守令不職之愆與子孫不孝之罪以敬天下之為人母者寧宗時董槐為廣德軍錄事參軍民有誣富人李楠私鑄兵結豪傑以應李全者郡捕繫之獄槐察其枉以白守守曰為反者解說族矣槐

曰吏明知獄有枉而擠諸死地以傳於法顧法豈謂諸被告者無論枉不枉皆可殺乎不聽頃之守以憂去槐攝通判州事歎曰楠誠枉今不為出之生無繇矣乃為翻其辭明其不反書上卒脫楠獄

遼天祚初窮治耶律伊遜黨有司不以為意御史中丞耶律舍哩上書曰恩賞明則賢者勸刑罰當則姦人消二者既舉天下不勞而治伊遜竊權肆惡不勝名狀蔽先帝之明誣陷順聖構害忠謹敗國罔上自古所無賴

廟社之休陛下獲纂成業積年之寃一旦洗雪正陛下
英斷克成孝道之秋如蕭德勒台實伊遜之黨耶律赫
魯亦不為早辨賴陛下之明遂正其事臣見陛下多疑
故有司顧望不切推問伊遜在先帝朝權寵無比先帝
若以順考為實則伊遜為功臣陛下安得立耶先帝黜
逐嬖后詔陛下在左右是亦悔前非也陛下詎可忘父
讐不報寃逆黨不誅今靈骨未獲而求之不切傳曰聖
人之德無加於孝昔唐德宗因亂失母思慕悲傷孝道

益著周公誅飛廉惡來天下大悅願陛下下明詔求順
考之瘞所盡收逆黨以正邦憲快四方忠義之心昭國
家賞罰之用然後致治之道可得而舉矣

伊遜誣搆昭懷太子事具

詳舞柰篇按舍哩本傳云書奏不報聞者莫不歎惋總
論又云舍哩之書幸出於伊遜既敗之後獲行其說一
人之事一篇之中而互異如此今按天祚本紀乾統元
年十月上昭懷太子謚曰大孝順聖皇帝廟號順宗明
年四月詔誅伊遜黨徙其子孫於邊發伊遜德勒台之
墓剖招殘屍二事相去纔及半年舍哩上書月日雖不
可考書中既稱順考其距誅殘逆黨之時當亦不遠不
應初不報而旋即從之也本傳自相齟齬似從後論為
正且終遠之世臣下疏奏伉
直無如此書者故備載云

金世宗大定初嘗命左衛將軍達巴訪求良弓達巴多
自取及護衛入直者多以已意更代護衛羅索以告命
點檢司按鞠達巴妹入宮為巴哩達巴因內侍僧爾謂
巴哩曰我無罪問事者迫我誣服耳巴哩以聞命杖僧
爾百出達巴為隴州防禦使四年上謂宰相曰權勢之
家親識訴訟請屬官吏往往屈法伸情宜一切禁止九
年高德基為刑部尚書有犯罪當死者宰相欲從末減
德基曰法無二門失出猶失入也不從及奏帝是刑部

議因召諸尚書諭之曰朕即位已來以政事與宰相爭執是非者德基一人而已自今部上省三議不合即具以聞十五年唐古部族節度使伊喇摩多之子殺其妻而逃帝命追捕及既獲皇姑梁國公主請赦之帝曰公主婦人不識典法罪尚可容摩多請託至此豈可貸宥并罪之二十五年后族有犯罪者尚書省引入議奏帝曰法者公天下持平之器若親者犯而從減是使之恃此而橫恣也昔漢文誅薄昭有足取者前二十年時后

族濟州節度使烏凌阿綽嘗犯大辟朕未嘗宥今乃宥之是開後世輕重出入之門也宰臣曰古所以議親尊天子別庶人也帝曰外家自異於宗室漢外戚權太重致移國祚朕所以令諸王公主有權也夫有功於國議勲可也至若議賢既曰賢矣肯犯法乎脫或緣坐則固當減請也二十六年遂奏定太子妃大功以上親及與皇家無服者及賢而犯私罪者皆不入議帝曰法有倫而不倫者其改定之帝又謂宰臣曰親軍雖不識字亦

令依例出職若涉贓賄必痛繩之太尉左丞相克寧曰
依法則可帝曰朕於女直人未嘗不知優恤然涉於贓
罪雖朕子弟亦不能恕太尉之意欲姑息女直人耳知
大興府事赫舍哩執中坐贓命吏部侍郎李仲略鞠之
罪當削解權要競言太重帝意頗惑仲略奏曰教化之
行自近者始京師四方之則也郡縣守令無慮數百此
而不懲何以勵後況執中兇殘狠愎慢上虐下豈可宥
之帝曰卿言是也將陵主簿高德溫大收稅戶米逮御

史獄具二法上帝怒責御史大夫張汝霖曰朕以卿為公正故登用之德溫有人在宮掖故朕頗詳其事朕肯以宮掖之私撓法耶不謂卿等顧徇如是賈少冲以刑部郎中攝右司員外郎嘗執奏刑名甚堅既退帝謂侍臣曰少冲居下位乃有守如此大懷貞為興中尹有錦州富民蕭鶴壽塗中殺人匿於府少尹家有司捕不得懷貞以計取之卒寘於法越王永功於章宗時判大宗正與應州僧善僧將訴事於彰國軍節度使伊喇呼喇

求永功手書與呼喇為地呼喇得書奏之帝謂宰臣曰
永功以書請託事雖細微不可不懲凡人小過不治遂
致大咎有犯必懲庶幾能改是亦教也皆曰陛下用法
無私臣下敢不敬畏於是永功解職宣宗興定時伊爾
必斯為右副元帥備潼關次澠池兵潰伊爾必斯變易
姓名與其妻之妹赫舍哩氏及僕婢三人亡匿柘城縣
民舍既而赫舍哩氏為其姑所捕執伊爾必斯妻子亦
在京師有司請窮治蹤跡詔令自出特赦死伊爾必斯

乃使其子上書請圖後效御史中丞完顏伯嘉奏曰古
之為將者進不忘死退不避罪伊爾必斯膺國重寄握
兵數萬未陳而潰委棄虎符既不克援枹鼓以死敵又
不能負斧鑕而請罪逃命竄伏猥居里巷挾匿婦人為
此醜行聖恩寬大曲貸其死自當奔走闕庭惶恐待命
乃安坐要君略無忌憚跡其情罪實不容誅此而不懲
朝綱廢矣乞尸諸市以戒為臣之不忠者

按法莫重於
失律罪莫大

於無君伊爾必斯喪師亡命醜穢悖慢雖泉磔不足以
蔽辜乃宣宗是伯嘉之奏終以先有赦令僅予除名亦

失政刑
之甚矣

哀宗正大二年內族旺嘉努故殺鮮于主簿權

貴多救之帝曰英王朕兄也敢妄撻一人乎朕為人主
敢以無罪戮一人乎國家衰弱之際生靈幾何而族子
恃勢殺一主簿吾民無主矣即命斬之劉肅為尚書省
令史時盜內藏官羅及珠盜不時得逮繫貨珠牙僧及
藏吏誣服者十一人刑部議皆置極刑肅執之曰盜無
正賊殺之寃帝怒有近侍夜見肅具道其旨肅曰辨析
寃獄我職也惜一已而戕十一人之命可乎明日詣省

辨愈力右司郎中張天綱曰吾為汝具奏辨析之帝悟
囚得不死

元世祖在潛邸時分地在關陝奏以廉希憲商挺宣撫
陝西以趙良弼參議司事阿勒達爾當國憚世祖英武
讒於憲宗即命為陝西行省左丞相劉太平參知政事
鈎校京兆錢穀鍛鍊羣獄死者二十餘人衆皆股栗良
弼力陳大義詞氣懇款二人卒不能誣故宣撫司一無

所坐

按廉希憲傳又載阿勒達爾等撿覈所部用酷吏
分任其事大開告訐希憲曰宣撫司事由已出有

欽定四庫全書

卷一百十五

罪同當獨任僚屬何與
故事竟卒無獲罪者

中統三年趙炳為刑部尚書兼

中書省斷事官時有攜妓登龍舟者即按之以法未幾
其人死其子犯蹕訴冤詔讓之炳曰臣執法尊君職當
為也帝怒命之出既而謂侍臣曰炳用法太峻然非徇
情者王磐為真定順德等路宣慰使邢水縣達嚕噶齊
蒙古低貪暴不法縣民苦之有趙清者發其罪既具伏
矣適初置監司其妻懼無以減口召家人飲酒至醉以
利啗之使夜殺清清逃獲免乃盡殺其父母妻子清訴

諸官權要蔽蒙古低不為理又欲反其獄磐竟奏置諸
法籍其家以半給清郡有西域大賈稱貸取息有不時
償者輒置獄於家拘繫撈掠且恃勢干官府直來坐廳
事指麾自若磐大怒叱左右摔下箠之數十時府治寓
城上即擠諸城下幾死郡人稱快

按廉希憲傳西域人
自稱駙馬繫富民誣

其祖父嘗貸息錢希憲令械
繫之其事相類故不重載

至元初奸臣阿哈瑪特領

左右部專總材賦會其黨相攻擊帝命中書推覆衆畏
其權莫敢問平章政事廉希憲窮治其事以狀聞杖阿

哈瑪特罷所領歸有司帝諭希憲曰吏廢法而貪久矣
自卿等為政朕無此憂言者訟宰相史天澤親黨布列
中外威權日甚詔罷天澤政事待鞠希憲謂天澤無肆
橫不臣狀力爭於帝前帝良久曰卿且退朕思之明召
希憲諭曰昨思之天澤無對訟者事遂解又有訟四川
帥竒徹者帝勅中書急遣使誅之明日希憲覆奏帝怒
曰尚爾遲迴耶對曰竒徹大帥以一小人言被誅民心
必駭收繫至京師與訟者廷對然後明其罪於天下為

宜詔遣使者按問事竟無實竒微得免參議樞密院事
費正寅素憮狡有告其罪者詔丞相錫津與侍御史張
雄飛雜治之請託交至雄飛獨無所顧盡發其罪狀并
其黨與皆伏誅嗣左遷同知京兆總管府事宗室公主
有家奴逃渭南民間為贅壻主適過臨潼識之械其奴
并奴妻及妻之父母盡沒其家貲雄飛與主爭辨詞色
俱厲主不得已悉還而遣之但挾其奴以去入為兵部
尚書平章阿哈瑪特在制國用司時與伊瑪都鼎有隙

至是羅織其罪同僚爭相附會雄飛不可曰所犯在制國用司時平章獨不預耶衆無以答秦長卿劉仲澤亦以忤阿哈瑪特皆下吏欲殺之雄飛持之甚力阿哈瑪特使人陷之曰誠能殺此三人當以參政相處雄飛曰殺無罪以求大官吾不為也阿哈瑪特怒出為澧州安撫澧有巨商二人犯匿稅及毆人事僚佐受賂欲寬其罪雄飛繩之急或曰此細事何執之堅雄飛曰吾非治匿稅毆人者欲改宋弊政懲不畏法者爾是時四方多

盜詔犯者皆殺無赦所在繫囚滿獄因符寶郎董文忠

言乃革其令

具刑制篇

或告漢人毆傷國人及太尉監屬盧

甲盜剪官布帝怒命殺以懲衆文忠言今刑曹於囚罪
當死者已有服辭猶必詳讞是豈可因人一言遽加重
典宜付有司閔實以俟後命乃遣文忠及近臣圖們分
覈之皆得其誣狀帝因責侍臣曰方朕怒時卿曹皆不
敢言非文忠開悟朕心則殺二無辜之人必取議中外
矣詔悉原免并賜文忠金尊以旌其直二十年江淮行

省宣慰使郝顯李兼懋平章蒙古台不法有詔弗問仍
以顯等付蒙古台鞠之繫於獄必抵以死行臺監察御
史申屠致遠慮囚浙西知其寃將縱之蒙古台脅之以
勢致遠不為動親脫顯等械俾從軍自贖僧格當國治
書侍御史陳天祥使湖廣劾平章約蘓穆爾僧格摘其
疏中語誣以不道奏遣使往鞠臺中咸憚往致遠慨然
請行比至累章極論其誣僧格方促定天祥罪閱致遠
章乃氣沮有小吏誣告漕臣劉獻盜倉粟僧格方事聚

斂衆阿其意鍛鍊誣服刑部尚書理智理威曰刑部天下之平今輦轂之下漕臣以寃死何以正四方乎即以實聞以是忤僧格出為江東道宣慰使二十四年分中書為尚書省僧格引用黨與鈎考天下錢糧凡阿哈瑪特時積年負逋舉以中書失徵奏誅二參政行省乘風督責尤峻主無所償則責及親戚或逮繫隣黨械禁榜掠民不勝苦自裁及死獄中者以百數中外騷動廷臣顧忌皆莫敢言利用監徹爾具陳僧格姦貪誤國害民

狀辭語激烈帝怒謂其毀詆大臣失禮體命左右批其
頰徹爾辨愈力於是帝大悟誅僧格枉繫者始得釋其
黨人納蘓拉鼎等既誅帝以實都長於理財欲釋不殺
平章政事布呼密力爭之不從日中凡七奏卒誅之圖
爾哈求欽察之為人奴者增益其軍而多取編民中
書僉省王遇驗其籍改正之圖圖爾哈遂奏遇有不臣
語帝怒欲斬之布呼密諫曰始令以欽察之人奴為兵
未聞以編民也萬一他衛皆倣此戶口耗矣若誅遇後

人安肯為陛下盡職乎帝意解過得不死成宗即位聽斷明果多采布呼密之言西僧為佛事請釋罪人祈福謂之圖魯木豪民犯法者皆賂之以求免有殺主殺夫者西僧請被以帝后御服乘黃犢出宮門釋之云可得福布呼密曰人倫者王政之本風化之基豈可容其亂法如是帝責丞相曰朕戒汝無使布呼密知今聞其言朕甚媿之有奴告主者主被誅詔即以其主所居官與之布呼密曰若此必大壞天下之風俗使人情愈薄無

復上下之分矣帝悟為追廢前命大德七 years 左丞相達爾罕言僧人修佛事畢必釋重囚有殺人及妻妾殺夫者悉皆指名釋之生者苟免死者負冤於福何有帝嘉納之十一年詔行世祖時條格中書省臣言法者譬之權衡不可偏重世祖已有定制自元貞已來以作佛事之故放釋有罪失於太寬故有司無所遵守今請凡內外犯法之人悉歸有司依法裁決制可仁宗延祐時雲南行省右丞賽音濟勒威有罪國師綽斯嘉旺札勒奏

請釋之帝斥之曰僧人宜誦佛書官事豈當預耶不聽
又參議中書省事竒實堅坐鬻官刑部以法當杖太后
命笞之英宗為皇太子奏曰不可法者天下之公徇私
而輕重之非示天下以公也卒正其罪皇姊大長公主
僧格喇實作佛事釋全寧府重囚二十七人敕案問全
寧守臣阿從不法仍追所釋囚還獄巴爾斯濟蘓下獄
帝謂左右曰法者祖宗所制非朕所得私巴爾斯濟蘓
雖事朕日久今既有罪當論如法文宗至順二年約爾

珠為江西等處行中書省平章事有誣告富民負永寧王官帑錢八百餘錠者中書遣使諸路徵之使至江西約爾珠曰事涉誣罔不可奏命僚佐重違宰臣意約爾珠曰民惟邦本傷本以斂怨亦非宰相福也令使者以此意復命時雅克特穆爾為丞相聞其言感悟命刑部詰治得誣罔狀罪誣告者若干人宰相以奏帝嘉之順帝至元四年有婦宋娥者與隣人通隣人謂娥將殺而夫娥曰張子文行且殺之明日夫果死跡盜數日娥始

以張子文告其姑五府官以為非共殺且既經赦宥宜
釋之御史扎實曰張子文以為娥固許之矣且娥夫死
及旬乃始言之是娥與張同謀度不能終隱故發之也
豈赦可釋哉樞密判官曰平反活人陰德也御史勿執
常法扎實曰是謂故出人罪非平反也且公欲種陰德
於生者奈死者何乃獨上議刑部卒正娥罪五年歸暘
僉河南廉訪司事行部西京以法繩趙王府官屬之貪
暴者王三遣使請暘為不動九年臺臣議賊吏遭喪不

許歸葬須竟其獄都事成遵曰惡人固可怒然與人倫孰重國家方以孝治天下寧失罪人不可使天下有無親之吏議遂寢

明太祖洪武初御史中丞劉基謂宋元寬縱今宜肅紀綱令御史糾劾無所避時帝幸汴梁宿衛官侍有過者皆啓皇太子置之法中書省都事李彬坐貪縱抵罪左丞相李善長素暱之請緩其獄基不聽馳奏報可方祈雨即斬之八年鳳陽宮殿成帝坐殿中若有人持兵鬪

殿脊者善長奏諸工匠用厭鎮法帝將盡殺之工部尚書薛祥為分別交替不在工者並鐵石匠皆不預活者千數營謹身殿有司列中匠為上匠帝怒其罔命棄市祥在側爭曰奏對不實竟殺人恐非法得旨用腐刑祥復徐奏曰腐廢久矣莫若杖而使工帝然之九年詔官吏有罪者笞已上悉屯謫鳳陽至萬數陝西按察司僉事韓宜可疏爭之曰刑以禁淫慝一民軌宜論其情之輕重事之公私罪之大小今悉令謫屯此小人之幸君

子殆矣乞分別以協衆心帝嘉納之英宗正統中法司因旱恤刑有王綱者惡逆當辟或憫其少欲緩之吏部左侍郎魏驥持不可曰此婦人之仁天道不時正此故也獄決而雨孝宗弘治末年刑部尚書閔珪讞重獄忤旨久不下帝與兵部尚書劉大夏語及之對曰人臣執法効忠珪所為無足異帝曰且道自古君臣曾有此事否對曰臣幼讀孟子見瞽瞍殺人臯陶執之之語珪所執未可深責也帝領之明日疏下遂如擬世宗即位七

月因日精門災疏理寃抑命再問緩死者三十八人而
廖鵬王璫齊佐等與焉給事中李復禮等言鵬等皆江
彬錢寧之黨王法所必誅乃令禁之如故嘉靖初革錦
衣傳奉官十六汰旗校十五復論緝事官校惟察不軌
妖言人命強盜重事他詞訟及在外州縣事毋得預未
幾中官葛景等奸利事覺為言官所糾詔下司禮監察
訊刑部尚書林俊言內臣犯法法司不得訊是官府異
體也乞下法司公訊以昭平明之治中官崔文家人李

陽鳳索匠師宋珏賄不獲嗾文杖之幾死下刑部治未決而中旨移鎮撫司俊留不遣力爭不納明日又奏帝怒責陳狀俊言祖宗以刑獄付法司以緝獲姦盜付鎮撫訊鞫既得猶必付法司擬罪未有奪取未定之囚反付推問者文先朝漏姦罪不容誅茲復干內降臣不忍朝廷百五十年紀綱為此輩壞亂帝憚其言直乃不問中官黃錦誣劾高唐判官金坡詔逮之連五百餘人御史馬錄言祖宗內設法司外設撫按百餘年刑清政平

先帝時劉瑾錢寧輩蠱惑聖聰動輒遣錦衣官校尉致天下洶洶陛下方勤新政不虞復有高唐之命給事中許復禮等亦以為言獄得少解王世貞為刑部郎中奸人閭姓者犯法匿錦衣都督陸炳家世貞搜得之炳介嚴嵩以請不許穆宗隆慶初年任用宦官旨多從中下刑科給事中舒化言法者天下之公大小罪犯宜悉付法司不當則臣等論劾若竟自勅行則喜怒未必當而法司與臣等俱虛設帝是其言路楷楊順以搆殺沈鍊

論死

具舞
素篇

大學士高拱欲庇楷謂順首禍順死楷可勿

坐化取獄牘示拱曰獄故無鍊名有之自楷始楷誠罪
首拱又議宥方士王金等罪化言此遺詔即欲勿罪宜
何辭由是忤拱神宗即位冬月詔停刑者三矣五年九
月司禮太監孫得勝復傳旨大昏期近命閣臣於三覆
奏本擬旨免行刑大學士張居正言祖宗舊制凡犯死
罪鞠問既明依律棄市嘉靖末年世宗皇帝因災醮始
有暫免不決之令或間從御筆所勾量行取決此特近

年姑息之弊非舊制也臣等詳閱諸囚罪狀皆滅絕天
理敗傷彞倫今獨見犯罪者身被誅戮之可憫而不知
彼所戕害者皆含冤蓄憤於幽冥之中使不一雪其痛
怨恨之氣上干天和所傷必多若不行刑年復一年充
滿囹圄既費關防又乖國典其於政體又大謬也給事
中嚴用和等亦以為言詔許之崇禎間姜埰熊開元下
獄莊烈帝諭掌衛駱養性潛殺之養性洩上語且言二
臣當死宜付所司書其罪使天下明知若陰使臣殺之

天下後世謂陛下何如主會大臣多為塚等言乃得長
繫



欽定續通典卷一百十五

欽定四庫全書

史部

欽定續通典卷一百十六
七

詳校官監察御史_臣曹錫寶

洗馬_臣王坦修覆勘

校對官編修_臣王春煦

謄錄舉人_臣高若越

欽定四庫全書

欽定續通典卷一百十六

刑

贖刑

虞

周

漢

後漢

遼

晉

南北朝

明

隋

臣等謹按自古帝王不得已而用刑其明慎欽恤

者莫如虞舜舜典曰金作贖刑列於鞭扑之次肆赦之前金非加入之物贖而仍言刑者出金之與受扑俱世人所患故得指其所出以為刑名周穆

王作呂刑五刑之屬三千墨辟而上至於大辟刑
疑則赦從罰定以鍤鈇輕重之差使與罰各相當
繼言罰懲非死人極於病蓋財者人之所甚欲奪
其欲以病之俾不為惡即虞書命刑之義馬端臨
謂唐虞之時刑清律簡是以止及鞭扑而五刑無
贖法比及於周條律紛繁若盡從而刑之何莫非
投機觸罟者穆王哀之而五刑各以贖論大約其
情可矜其法可議蓋哀恤之意居多非利其貨也

詳繹二篇文義舜典主於誤呂刑主於疑後世論贖率不外此而死罪非實犯多亦有許贖者至於輸納之品孔安國傳於舜典謂為黃金於呂刑謂為黃鐵虞不言成數而周制有等差古者金銀銅鐵總號為金孔穎達正義謂其實皆銅也漢及後魏皆用黃金漢納金特少其斤兩令與銅相埒舊說太半兩為鈞十鈞為鎰鎰重六兩太半兩死罪千鎰當出四百一十六斤六兩太半兩銅與金贖

死罪金三斤為價相依倣其後納粟納繭亦不一
後魏以金難得合金一兩收絹十疋唐時復古死
罪贖銅一百二十斤於古稱為三百六十斤然較
漢已為輕減元宗詔許準折納錢而犯者益便捷
至金元或以牛馬雜物明初專用鈔弘治中鈔法
既壞乃許折銀錢準算周官八議之法後世定律
率遵用之至明洪武六年工部尚書王肅坐法當
笞太祖謂六卿貴重不宜以細故辱命以俸贖後

羣臣里誤準以俸贖始此此歷代輸贖之大略也
杜佑著刑典獨不及贖刑一門未免闕略今采自
有虞迄於明代以補其罅漏仍倣馬氏通考之例
列於赦宥篇之前庶幾有合於尚書之義云

虞舜金作贖刑

周官職金掌受士之金罰貨罰入於司兵

給治兵及工直也貨泉貝

也疏言斷獄訟者有疑即使出贖既言金罰又言貨罰者出罰之家時或無金即出貨以當金直故兩言之

穆王呂刑墨辟疑赦其罰百鍰閱實其罪劓辟疑赦其

罰惟倍閱實其罪非辟疑赦其罰倍差閱實其罪宮辟

疑赦其罰六百鍰閱實其罪大辟疑赦其罰千鍰閱實

其罪

疑謂虛實之證等是非之理均或事涉疑似旁無證見或雖有證見事非疑似如此之類言皆為疑

罪此既罪疑而取贖疑罪不定恐受贖參差故五罰之下皆言閱實其罪恐其不相當故也錢六兩也鄭及爾雅同說文云六鈞也鈞十一銖二十五分銖之十三也馬同賈逵說俗儒以鈞重六兩周官例重九兩俗儒近是倍百為二百錢倍差謂倍之又半為五百錢傳言五百錢馬云倍二百為四百差者又加四百之三分之一凡五百三十三錢三分錢之一也人犯輕刑者多犯重刑者少又以錢數以倍相加序五刑先輕後重取事之宜經歷陳罰之錢數傳言五刑疑各入罰不降相因疏云以其所犯疑不能決故使贖之次刑非其所犯故不

令死疑入宮宮疑
入則是古之制也

漢惠帝元年令民有罪得買爵三十級以免死罪

應劭曰一

級直錢二千凡為六萬若令贖罪入三十
足嫌矣師古曰令出買爵之錢以贖罪

孝文時納黿

錯之說募民入粟塞下得以除罪武帝天漢四年征匈奴

奴大司農陳藏錢經用賦稅既竭不足以奉戰士乃令

死罪入贖錢五十萬減死一等宣帝地節三年西羌反

遣後將軍征之京兆尹張敞言國兵在外吏民並給轉

輸田事頗廢來春民食必乏縣官穀度不足以振之願

令各諸有罪非盜受財殺人及犯法不得赦者皆得以

差入穀此八郡贖罪

八郡者隴西已北安定已西

務益致穀以豫備

百姓之急事下有司少府蕭望之等議如此則富者得

生貧者獨死是貧富異刑而法不一也不可於是天子

復下議兩府丞相御史以難問敞敞言令罪人出財減

罪其名賢於煩擾良民橫興賦斂又諸盜及殺人犯不

道者百姓所疾苦也皆不得贖首匿見知縱所不當得

為之屬議者或頗言其法可蠲除今因此令贖其便明

甚望之終以為不便丞相魏相御史大夫丙吉亦以為西羌且破轉輸略足相給遂不施敞議

後漢光武建武二十九年令天下罪囚殊死已下及徒各減本罪一等其餘贖罪輸作有差明帝即位詔罪囚中二千石下至黃綬貶秩贖論者悉皆復秩還贖又詔天下亡命殊死已下聽得贖論死罪入縲二十疋右趾至髡鉗城旦舂十疋金城旦舂至司寇作三疋其未發覺詔書到日先自告者半入贖永平八年詔犯罪亡命

者贖罪各有差十五年詔亡命殊死已下贖死罪緡四

十足右趾及髡城旦舂十足全城旦至司寇五足餘如

即位初制

十八年詔贖死罪減緡十足章帝建初七年詔又減緡十足如永平初年故事右趾髡鉗

已下各有差

和帝永元六年廷尉陳寵言今律令贖罪已下

二千六百八十一溢於甫刑者七十九事宜令三公廷

尉平定律令應經合義者并大辟耐罪贖罪為三千悉

刪除其餘條使與禮相應議未及施而寵免後遂寢順

帝漢安二年令罪囚殊死已下出緡贖各有差其不能

入贖者遣詣臨光縣居作二歲桓帝建和三年詔死罪亡命已下贖各有差靈帝建寧元年令天下繫囚未決

入縲贖各有差

三年及熹平六年光和三年中平四年俱有此令

晉新律意善功惡以金贖之金等不過四兩

梁武帝即位詔曰金作贖刑有聞自昔入縲以免施於中代民悅法行莫尚乎此可依周漢舊典有罪入贖其科凡在官身犯罰金鞭扑杖督之罪悉入贖停罰其臺省令史士卒欲贖者聽之其制刑為十五等之差棄市

已上為死罪大罪梟其首其次棄市刑二歲已上為耐
罪言各隨技能而任使之也有髡鉗五歲刑笞二百收
贖絹男子六十匹又有四歲刑男子四十八匹又有三
歲刑男子三十六匹又有二歲刑男子二十四匹罰金
一兩已上為贖罪贖死者金二斤男子十六匹贖髡鉗
五歲刑笞二百者金一斤十二兩男子十四匹贖四歲
刑者金一斤八兩男子十二匹贖三歲刑者金一斤四
兩男子十匹贖二歲刑者金一斤男子八匹罰金十二

兩者男子六匹罰金八兩者男子四匹罰金四兩者男子二匹罰金二兩者男子一匹罰金一兩者男子二丈女子各半之五刑不簡正於五罰五罰不服正於五過以贖論故為此十五等之差將吏已上及女子應有罰者以罰金代之天監三年詔以金作權典宜在蠲息於是除贖罪之科大同十一年復開罪身皆聽入贖

陳存贖罪之律其三歲刑若有官准當二年餘一年贖若公坐過誤罰金其二歲刑有官者贖論一歲刑無官

亦贖論

元魏起自朔方其初刑法甚峻死罪至多後乃令當死者其家獻金馬以贖

北齊律贖罪舊有金皆代以中絹死百匹流九十二匹刑五歲七十八匹四歲六十四匹三歲五十匹二歲三十六匹各通鞭笞論一歲無笞則通鞭二十四匹鞭杖每十贖絹一匹至鞭百則絹十匹無絹之鄉皆准絹收錢自贖笞十已上至死又為十五等之差當加減次如

正決法合贖者謂流內官及爵秩比視老小閹癡并過失之屬犯罰絹一匹及杖十已上皆名為罪人

後周制其贖杖刑五金一兩至五兩贖鞭刑五金六兩至十兩贖徒刑五一年金十二兩二年十五兩三年一斤二兩四年一斤五兩五年一斤八兩贖流刑一斤十二兩俱役六年不以遠近為差等贖死罪金二斤婦人當笞者聽以贖論應贖金者鞭杖十收中絹一匹流徒者依限歲收絹十二疋死罪者一百疋其贖刑死罪五

旬流刑四旬徒刑三旬鞭刑二旬杖刑一旬限外不輸者歸於法貧者請而免之

隋制官品第九已上犯罪者聽贖應贖者皆以銅代絹贖銅一斤為一負負十為殿笞十者銅一斤加至杖百則十斤徒一年贖銅二十斤每等加銅十斤三年則六十斤矣流一千里贖銅八十斤每等則加銅十斤三里則百斤矣絞斬二死刑皆贖銅百二十斤煬帝即位以高祖禁網深刻每加減降時斗秤皆小舊二倍其贖

銅亦加二倍為差其實不異開皇舊制

唐律贖銅之數及以官當罪之法大略悉準隋制以官當徒者五品以上犯罪者一官當徒二年九品以上一官當徒一年若犯公罪者各加一年以官當流者三流同皆比徒四年仍各解見任除名者比徒三年免官者比徒二年免所居官者比徒一年九品已上官若官品得減者之祖父母父母妻子孫犯流罪已下聽贖

七品五品

已上官親屬流罪已下得減一等

軍民年七十已上十五已下及廢疾

犯流罪已下者準此玄宗天寶六載敕節文其贖銅如情願納錢每斤一百二十文若欠負官物應徵正贖及贖物無財以備官役折庸其物雖多限三年一人一日折絹四匹若會恩其物合免者停役憲宗元和三年詔今後應坐贓及他罪當贖者諸道委觀察判官一人專勾當及時申報如蔽匿不申者節級科貶如罪不繫奏官長量情處置者其贓但準前申送御史臺充本色給用仍差御史一人專知贓贖不得以贓罰為名如罪名

未正妄罰其財亦委觀察判官勾當差定後先具名奏聞
傳宗乾符三年敕應殘疾篤疾犯徒流罪或是連累
即許徵贖如身犯罪不在免限其年十五已下者準律
文處分

晉高祖天福六年尚書刑部員外郎李象奏請今後凡
是散官不計高低若犯罪不得當贖亦不得上請詳定
院覆奏應内外文武官有品官者自依品官法無品官
有散試官者應内外帶職廷臣賓從有功將校等並請

同九品官例其京都軍巡使及諸道州府衙前職員內
外雜任鎮將等並請準律不得上請當贖其巡司馬步
司判官雖有曾厯品官者亦請同流外職準律杖罪已
下依決罰例徒罪已上仍依當贖法

宋制最慎贖刑非入議者幾不得與刑統名例律有用

官蔭減贖之條太祖乾德四年

通考作開寶四年

以大理正高

繼申言

具雜議篇

詔犯罪身無官須祖父曾任本朝官及仕

前代三品已上官有功惠及民者乃得請又定流內品

官任流外職準律文徒罪已上依當贖法諸司受勒留
官及歸司人犯徒流等罪公罪許贖私罪以決罰論太
宗淳化四年

通考作端拱三年

詔諸州民犯薄罪或入金贖長

吏得以任情而輕重之自今並決杖遣之不以贖論婦
人犯杖已下非故為量輕重笞罰或贖銅釋之仁宗議
立贖法詔曰先王用法簡約使人知禁而易從後代設
茶酒鹽稅之禁奪民厚利刑用滋章今之編敕皆出律
外又數改更官吏且不能曉百姓安得聞之一陷於理

情雖可哀法不得贖豈禮樂之化未行而專用刑罪之
弊與漢文帝使天下人入粟於邊以受爵免罪幾於刑
措其議科條非著於律者或冒利犯禁奢侈違令或過
誤可憫別為贖法鄉民以穀麥市人以錢帛使人重穀
麥免刑罰則農桑自勸富壽可期矣詔下論者以為富
人得贖而貧者不能免非朝廷用法之意不果行至和
初詔前代帝王後嘗仕本朝官不及七品者祖父母父
母妻子流罪已下聽贖雖不仕而嘗被賜予者有罪非

巨蠹亦如之隨州司理參軍李抃父毆人死抃上所授
官以贖父罪帝哀而許之君子以為失刑神宗熙寧四
年前單州碭山尉王存立言嘉祐中同學究出身為尉
嘗納官贖父配隸罪願同舉人例得免丁徭詔復賜出
身仍與注官時中書言刑名未安者五條其四令州縣
考察士民有能孝悌力田為衆所知者給帖付身偶有
犯令情輕可恕者特議贖罰其不悛者科決後竟不行
遼制品官公事誤犯民年七十已上十五已下犯罪者

聽以贖論贖銅之數杖一百者輸錢千太祖七年于厥掠生口者俾贖其罪放歸本部興宗重熙元年詔執事官公罪聽贖私罪各從本法

金國舊俗凡親屬犯罪欲以牛馬雜物贖者從之或重罪亦聽自贖然恐無辨於齊民則剗刵以為別世宗大定八年制品官犯賭博法贓不滿五十貫者其決杖聽贖再犯者不聽且曰杖者所以罰小人也既為職官當先廉恥既無廉恥何以贖為時焦旭攝左警巡事以杖

親軍百夫長有司論當杖決帝曰旭親民吏也若因杖有官人復行杖之何以行事其令收贖章宗泰和元年新律成贖銅皆倍於舊宣宗時完顏伯嘉知歸德府上言乞雜犯死罪已下許納粟贖免宰臣奏伯嘉前在代州嘗行之蓋一時之權不可為常法遂寢

元制諸職官犯夜及牧民官公罪之輕者許罰贖又諸年老七十已上年幼十五已下不任杖責及癰篤殘疾有妨科決者贖世祖至元二年諸王塔齊爾使臣庫庫

楚至北京花道驛手殺驛吏郝用及郭和尚有旨徵鈔
十錠給其主以贖死二十一年以哈扎爾齊依舊揚州
鹽運使歲市鹽八十萬石以贖過

明贖法有二有律得收贖者有例得納贖者律贖無敢
損益而納贖之例則因時權宜先後互異其端實自開
國時啓之律凡文武官以公事犯笞罪者官照等收贖
錢吏每季類決之各還職役不附過杖已上記所犯罪
名每歲類送吏兵二部候九年滿考通記所犯次數黜

陟之吏典亦備銓選降叙至於私罪其文官及吏典犯
笞四十已下者附過還職而不贖笞五十者調用軍官
杖已上皆的決文官及吏杖罪並罷職不叙至嚴也然
自洪武中年已三下令准贖及雜犯死罪已下矣三十
年命部院議定贖罪事例凡內外官吏犯笞杖者記過
徒流遷徙者俸贖之三犯罪之如律自是律與例互有
異同及頒行大明律御製序雜犯死罪徒流遷徙等刑
悉視今定贖罪條例科斷於是例遂輔律而行永樂四

年十一月法司進月繫囚數凡數百人大辟僅十之一
成祖諭曰此等既非死罪而久繫不決天氣沍寒必有
聽其寃死者凡雜犯死罪已下約二百悉准贖發遣仁
宗初即位諭都察院言輸罰工作之令行有財者悉倖
免宜一論如律久之其法復弛英宗正統間侍講劉球
言輸罪非古自公罪許贖外宜悉依律時不能從其後
循太祖之例益推廣之凡官吏公私雜犯准徒已下俱
聽運炭納米等項贖罪其軍官軍人照例免徒流者例

贖亦如之矣贖罪之法明初嘗納銅成化間嘗納馬後
皆不行不具載惟納鈔納錢納銀常並行焉而以初制
納鈔為本故律贖者曰收贖律鈔納贖者曰贖罪例鈔
永樂十一年令除公罪依例紀錄收贖及死罪情重者
依律處治其情輕者斬罪八千貫絞罪及榜例死罪六
千貫流徒杖笞納鈔有差無力者發天壽山種樹宣宗
宣德二年定笞杖罪囚每十贖鈔二十貫徒流罪名每
徒一等折杖二十三流並折杖百四十其所罰鈔悉如

笞杖所定無力者發天壽山種樹死罪終身徒流各按
年限杖五百株笞一百株景帝景泰元年令問擬笞杖
罪囚有力者納鈔笞十二百貫每十以二百貫遞加至
笞五十為千貫杖六十千八百貫每十以三百貫遞加
至杖百為三千貫其官吏贓物亦視今例折鈔英宗天
順五年今罪囚納鈔每笞十鈔二百貫餘四笞遞加百
五十貫至杖六十增為千四百五十貫餘杖各遞加二
百貫憲宗成化二年令婦人犯法贖罪孝宗弘治十四

年定折收銀錢之制例難的決人犯并婦人有力者每杖百應鈔二千二百五十貫折銀一兩每十以二百貫遞減至杖六十為銀六錢筭五十應減為鈔八百貫折銀五錢每十以百五十貫遞減至筭二十為銀二錢筭十應鈔二百貫折銀一錢如收銅錢每銀一兩折錢七百文其依律贖鈔除過失殺人外亦視此數折收武宗正德二年定錢鈔兼收之制如杖一百應鈔二千二百五十貫者收鈔千一百二十五貫錢三百五十文世宗

嘉靖七年巡撫湖廣都御史朱廷聲言收贖與贖罪有異在京與在外不同鈔貫止聚於都下錢法不行於南方故事審有力及命婦軍職正妻及例難的決者有贖罪例鈔老幼廢疾及婦人餘罪有收贖律鈔贖罪例鈔錢鈔兼收如笞一十收鈔一百貫錢三十五文其鈔二百貫折銀一錢杖一百收鈔千一百二十五貫錢三百五十文其鈔二千二百五十貫折銀一兩今收贖律鈔笞一十止贖鈔六百文比例鈔折銀不及一釐杖一百

贖鈔六貫折銀不及一分似為太輕蓋律鈔與例鈔貫
既不同則折銀亦當有異請更定為則凡收贖者每鈔
一貫折銀一分二釐五毫如答一十贖鈔六百文則折
銀七釐五毫以罪重輕遞加折收贖帝從其奏令中外
問刑諸司皆以此例從事

按廷聲此奏謂律鈔輕例鈔重然律鈔本非輕也祖制每

鈔一文當銀一釐所謂答一十折鈔六百文定銀七釐五毫者即當時之銀六錢也所謂杖一百折鈔六貫銀七分五釐者即當時之銀六兩也以銀六錢比例鈔折銀不及一釐以銀一兩比例鈔折銀不及一分而欲以此懲犯罪者之心宜其勢有所不行矣特以祖宗律文不可改也於是不得已定為七釐五毫七分五釐之制

而其實所定之數猶不足以當所贖者之罪然後例之
變通生焉考洪武朝官吏軍民犯罪聽贖者大抵罰役
之令居多如發鳳陽屯種滁州種苜蓿代農民力役運
米輸邊贖罪之類俱不用鈔納也律之所載皆若干鈔
若干文杖若干鈔若干貫者特垂一代之法爾然按三
十年詔令罪囚運米贖罪死罪百石徒流遞減其力不
及者死罪自備米三十石徒流十五石俱運納甘州威
虜就彼充軍計其米價腳價之費與鈔數差不相遠其
定為贖鈔之等第固不輕於後來之例矣然罪無一定
而鈔法之久日變日輕此定律時所不及料也即以永
樂十一年令斬罪情輕者贖鈔八十貫絞及榜例死罪
六千貫之詔言之八十貫者律之八十兩也六千貫者
律之六千兩也下至杖罪千貫笞罪五百貫亦一千兩
五百兩也雖革除之際用法特苛豈有死罪納至八十
兩笞杖罪納至一千兩五百兩而尚可行者則知鈔法
之弊在永樂初年已不啻輕十倍於洪武時矣宣德時

申交易用銀之禁冀通鈔法至弘治而鈔竟不可用遂
開准鈔折銀之例及嘉靖新定條例詳見下文俱以有
力稍有力二科贖罪有力米五斗准律之納鈔六百元
也稍有有力工價三錢准律之做工一月也是則後之例
鈔纔足比於初之律鈔耳而況老幼廢疾諸在律贖者
之銀七釐五毫准鈔六百文銀七分五釐准鈔六貫凡
所謂律贖者以比於初之律是時重修條例奏定贖例
鈔其輕重相去尤甚懸絕乎

在京則做工

每管一十做工一月折銀三錢至徒五年折銀十八兩

運囚糧

每管一十

米五斗折銀二錢五分至徒

五年五十石折銀二十五兩

運灰

每管一十一十二百斤折銀一兩二錢六

分至徒五年六萬

運甓

每管一十七十箇折銀九錢一

斤折銀六十三兩

九運水和炭五等

每管一十二百斤折銀四錢至徒

五年八十五百斤折銀十七兩

運

灰最重運炭最輕

此諸罪初皆冷親自赴役事完寧家無納贖之例其後法令益寬聽其折

納而估算事力亦略相當

在外則有力稍有力二等

初有頗有力次有力各等因御

史言而革

其有力視在京運囚糧

每米五斗納穀一石初折銀上庫後納穀上倉稍

有力視在京做工年月為折贖婦人審有力與命婦軍

職正妻及例難的決之人贖罪應錢鈔兼收者笞杖每

一十折收銀一錢其老幼廢疾婦人及天文生餘罪收

贖者每笞一十應鈔六百文折收銀七釐五毫於是輕

重適均天下便之至萬曆十三年復申明焉遂為定制

明法充軍之例最嚴有終身有永遠永遠者罰及子孫
皆以實犯死罪減等者充之嘉靖間有請開贖軍例者
世宗曰律聽贖者徒杖以下小罪耳死罪矜疑乃減從謫
發不可贖御史周時亮復請廣贖例部議審有力者銀
十兩得贖三年已上徒一年稍有力者半之而贖軍之
議卒罷御史胡宗憲言南方之人不任兵革其發充邊
軍者宜令納銀自贖部議以為然因擬納例以上帝曰
豈可預設此例以待犯罪之人復不允凡律贖若天文

生習業已成能專其事犯徒及流者決杖一百餘罪收

贖婦人犯徒流者決杖一百餘罪收贖

如杖六十徒一年全贖鈔應十

二貫除決杖准訖六貫餘鈔六貫折銀七分五釐他做此其決杖一百審有力又納例鈔二十二百五十貫應

收錢三百五十文鈔凡年七十已上十五已下及廢疾

犯流已下收贖八十已上十歲已下及篤疾盜及傷人

者亦收贖凡犯罪時未老疾事發時老疾者依老疾論

犯罪時幼小事發時長大者依幼小論並得收贖

如六十九

已下犯罪年七十事發或無疾時犯罪廢疾後事發得依老疾收贖他或七十九已下犯罪八十事發或廢

疾時犯罪，篤疾時事發，得上請八十九。若死罪九十事發，得勿論，不在收贖之例。若在徒年限

內老疾亦如之。

如犯杖六十徒一年一月之後老疾合計全贖鈔十二貫，除已杖六十准三貫。

六百文剩徒一年應八貫四百文，計算每徒一月贖鈔七百文，已役一月准贖七百文外，未贖十一月應收贖七貫七百文餘，做此。老幼廢疾收贖，惟雜犯五年仍科之，蓋在明初即真犯死罪不可以徒論也。其誣

告例告二事已上，輕實重虛或告一事誣輕為重者已

論決全抵剩罪未論決笞杖收贖徒流杖一百餘罪亦

聽收贖。

如告人笞三十內止一十實已決全抵剩二十之罪未決收贖一貫二百文，如告人杖六十內

止二十實已決全抵剩四十之罪未決收贖二貫四百文，如告人杖六十徒一年內止杖五十實已決全抵剩

杖一十徒一年之罪未決徒一年折杖六十併杖共七十收贖四貫二百文如告人杖一百流二千里內止杖六十徒一年實已決以總徒四年論全抵剩杖四十徒三年之罪未決以連徒折杖流加一等論共計杖二百二十除告實杖六十徒一年折杖六十剩杖一百贖鈔六貫若計剩罪過杖一百已上須決杖一百訖餘罪方贖聽收

又過失傷人准鬪毆傷人罪依律收贖至死者准收贖鈔四十二貫內鈔八分應三十三貫六已徒五年

再犯徒收贖鈔三十貫若犯徒流存留養親者止杖一百

餘罪收贖其法實杖一百不准折贖然後計徒流年限一視老幼例贖之此律自英宗時詔有司行

之後為制天文生婦女犯徒流決杖一百餘罪收贖者雖罪

止杖六十徒一年亦決杖一百律所謂應加杖者是也
皆先依本律議其所犯徒流之罪以誥減之至臨決時
某係天文生某係婦人依律決杖一百餘收贖所決之
杖並須一百者包五徒之數也然與誣告收贖剩杖不
同蓋收贖餘徒者決杖而贖徒收贖剩杖者折流歸徒
折徒歸杖而照數收贖之其法各別也其婦人犯徒流
成化八年定例除姦盜不孝與樂婦外若審有力并決
杖亦得以納鈔贖罪

例每杖十折銀一錢為率
至杖一百折銀一兩止

凡律所

謂收贖者贖餘罪也其例得贖罪者贖決杖一百也徒杖兩項分科之除婦人餘因徒流皆決杖不贖惟弘治十三年許樂戶徒杖笞罪亦不的決此律鈔之大凡也例鈔自嘉靖二十九年定例凡軍民諸色人役及舍餘審有力者與文武官吏監生生員冠帶官知印承差陰陽生醫生老人舍人不分笞杖徒流雜犯死罪俱令運灰運炭運甄納米納料等項贖罪

此上係不虧行止者

若官吏人

等例應革去職役

此係行止有虧者

與軍民人等審無力者笞

杖罪的決徒流雜犯死罪各做工擺站哨瞭發充儀從
情重者煎鹽炒鐵死罪五年流罪四年徒按年限其在
京軍丁人等無差占者與例難的決之人笞杖亦令
做工時新例犯姦盜受賊為行止有虧之人槩不許贖
罪惟軍官革職者俱運炭納米等項發落不用五刑條
例的決實配之文所以寬武夫重責文吏也於是在京
惟行做工運囚糧等五項在外惟行有力稍有二項
法令益徑省矣大抵贖例有二一罰役一納鈔而例復

三變罰役者後多折工值納鈔鈔法既壞變為納銀納米然運灰運炭運石運甑運碎甑之名尚存也至萬厯中年中外通行有力稍有力二科在京諸例并不見施行而法更歸一所謂通變而無失於古之意者此也初令罪人得以力役贖罪死罪拘役終身徒流按年限笞杖計日月或修造或屯種或煎鹽炒鐵滿日疎放疎放者引赴御橋叩頭畢送應天府給引寧家合充軍者發付陝西司按籍編發後皆折納工價惟赴橋如舊宣德

初詔官吏軍民自死罪至笞四十分十等納米贖罪納者贓罪得不死徒流以下復用不納者久繫不釋其法最弊有司復奉行不善拘繫滿獄二年御史鄭道寧言納米贖罪朝廷寬典乃軍儲倉拘繫罪人無米輸納自去年二月至今死者九十六人刑部郎中俞士吉因奏囚無米者請追納於原籍匠仍輸作軍仍備操若非軍匠則追還所隸州縣遣之詔如其請

伏讀

御批通鑑輯覽曰金作贖刑古人欽恤之義苟情有可矜而罪非不赦許其納米弛罪亦未始不可今不問其願與否

而強之使從令無力者轉受無窮之累則是為利起見而非為仁行權矣

蓋明律頗嚴凡朝廷

有所矜恤限於律而不得伸者一寓之於贖例所以濟法之太重也又國家得時藉其入以佐緩急而實邊足儲賑荒官府頒給諸大費往往取給於贖贖二者故贖法比歷代特詳云

欽定續通典卷一百十六

欽定四庫全書

欽定續通典卷一百十七

刑

赦宥

唐

五代

宋

遼

金

元

明

唐自肅宗至昭哀歷十四帝凡即位詔書必赦大辟已下常赦所不原者其他或受尊號或建儲宮或祀園丘或平僭亂以及改元弭變之類大則罪無輕重一切原免小則死罪降從流流以下釋放肆眚之典不可殫記

至德乾元之間與物更始赦命尤數詔書節文惟李林甫王鉞楊國忠親屬不在免限其兩京文武官應被賊逼受偽官三司推勘未了者一切放免合得官者仍酌量注擬至上元二年并詔名在流貶者委中書門下量輕重類例奏取處分凡左降官非叛逆緣坐及犯惡逆名教枉法盜賊如有親年八十已上及患在牀枕不堪扶持更無兄弟者許停官終養其流移人亦準此代宗初制自開元已來所有諸色犯累者並宜雪免左降官

并諸色流人及罰鎮効配軍團人等一切放還諸色流
貶者量移近處並詔東都河北應受賊脅從署偽官并
偽出身悉原其罪不問得史朝義將士妻子四百餘人
皆赦之僕固懷恩反免其家不緣坐德宗即位詔寶應
元年以後犯累禁錮及反逆緣坐等槩予洗滌貞元之
末十年無赦為太宗已來所僅見羣臣以微過譴逐者
無復叙用及順宗即位始得量移焉憲宗元和八年刑
部侍郎王播奏竊見諸處配流人逢赦悉得放還惟天

德軍五城及諸邊城配流人等均經本道奏留防邊遂
令沒身終無歸日臣又見比年邊城犯流者多是胥徒
小吏或是鬪打情形據罪可原在邊無益乞準依格例
處分

具刑
制篇

詔許放還自是遂為定制自穆宗已後每有

赦除其左降官並諸色得罪人縱元勅云終身不齒及
縱有恩赦不在免限者均得收錄放還惟官典犯贓罪
與十惡同科遇赦必申明不在免限之例長慶元年詔
應亡官失爵及放還流人如原有莊田不經沒官被人

侵射其本主或子孫已歸並委州府勘還務令安業文
宗太和三年滄平州李同捷之母及妻男等特免緣坐
李載義進滄鎮兩州將健生口共千餘人並減死分配
邊州防秋時有張璠劉建胡伯忠造偽出身文書賣官
并造偽印行用犯罪並在太和三年十一月十八日恩
赦前刑部大理寺詳斷悉處極刑御史中丞宇文鼎奏
準律赦前斷罪不當者若處輕為重宜改從輕處重為
輕即依輕法臣以前件囚等雖抵極法悉經殊恩或自

赦文全生或因起請減等緣引需澤累陳訴詞若非得中恐未服罪昨者一與一奪事關起請既生又死稍覺二三如臣所見伏請赦書已前犯者特許減論赦書以後所犯不得援例庶使後無僥倖令絕披陳勅張璠等三人宜準元勅處分

五季喪亂之中赦恩尤濫近則一年再降遠則每歲無遺惟十惡五逆火光行劫持刀殺人官吏犯贓屠牛鑄錢合造毒藥不在原免之限亦略遵唐制是時詔書所

及非惟宥罪抑且推恩藩方論薦動輒數百乃至藏典
書吏優伶奴僕初命即至銀青階被服皆紫袍象笏晉
天福中中書舍人李詳上疏極論其失唐制徒流人到
配隸所本管畫時申御史臺候年月滿日放還時久格
不行後唐清泰間乃詔依開成格施行周太祖廣順二
年赦書節文犯和姦者罪不至死先是凡和姦男子婦
人並處極法至是始準律科斷並詔諸犯罪人除反逆
外餘罪並不得籍沒家產誅及骨肉一依晉天福元年

已前條制處分數事差為得中焉

宋制遇非常覃慶則常赦所不原者咸除之其次釋雜犯死罪已下皆謂之大赦雜犯死減等而餘罪釋之流已下減等杖笞釋之皆謂之德音其恩霈所及止於京城兩京一州一路者則謂之曲赦又天子歲自錄京師繫囚畿內則遣使往往雜犯死罪第降等杖笞釋之或徒罪亦得釋若并及諸路則命監司錄焉太祖即位大赦天下後三歲遇郊則赦終宋之世遂為成典

太宗太平興國

三年將郊議赦有奉再恩者上書願勿赦引諸葛亮佐劉備數十年不赦事帝意感趙普對曰凡郊祀肆眚聖朝曩典其仁如天堯舜之道也若劉備區區一方臣所不取帝善之遂定赦仁宗景祐中言者以為三王歲祀圜丘未嘗輒赦自唐兵興已後事天之禮不常行因有大赦以蕩亂獄且有罪者宥之未必自新被害者抑之未必無怨不能自新將復為惡不能無怨將悔為善一赦而使民悔善長惡政教之大患也願罷三歲一赦俾良民懷惠凡人知禁即謂未可盡廢請命有司前郊三日理罪人有過誤者引而赦之州縣須詔到倣此疏上朝廷重其事第詔自今罪人情重者毋得一以赦免卒亦不果行

開寶八年有司言自

三年至今詔所貸死罪凡四千一百八人太宗嘗親錄

京師繫囚至日盱近臣或諫過勞帝曰倘惠及無告獄

訟不致枉撓朕深以為適何勞之有自是祁寒盛暑或
雨雪稍愆輒親錄繫囚多所原減歲以為常真宗咸平
二年詔曰如聞小民知有恩赦故為刼盜自今不在原
免之限景德二年大理寺又言郊禮在近諸州奏按多
不精詳冀於覆駁延留以俟恩宥請自今事狀明白者
即具情實定斷以絕僥倖詔可然自大中祥符已後崇
奉天書侈言封禪肆赦之令幾於無歲不有矣

天禧元年江南

提刑范應辰上言伏觀辛亥制書常赦不原者咸除之臣今所部州郡過誤而被宥者雖多竊害而蒙釋者亦

衆蓋以奸兇之輩密斷赦期狃於忿心發其夙憾單弱受辜強梁肆暴或舉家殞命罄室擄財或持刀殺人或縱火焚舍至有糾輕生之徒為強剽之盜公行戕害以茲奪資儲巡警之官上逼下逐設謀緝捕冒險鬪敵以茲敗獲合正典刑達此霽恩亦蠲其罪又配為卒伍咸給衣糧是何異賞人為盜耶請自今應有知赦在近而故為罪戾及赦後彰顯情理切害者死罪已下止遞減一等赦前殺人剽財赦後雖不復為若因事捕獲決隸遠惡州軍其殺人放火擄財劫貨已依赦配本城者如更配逃亡飲博之類所在長吏籍其罪由若再贖憲綱不問罪之大小禁錮奏裁帝覽之頗嘉其盡心然亦不能用也

仁宗在位久凡大赦二

十二而曲赦德音錄繫囚之數不與焉然赦常赦所不原者惟帝即位及明道中太后不豫行之而明道所行

人以為濫天聖初詔諸路按察官取乾興赦前配隸兵籍者列所坐罪狀以聞自是赦書下輒及之五年詔已下約束而犯刼盜及官典受贓勿復奏悉論如律初太祖將祀南郊詔兩京諸道自十月後犯強竊盜不得預赦所在長吏告諭民無冒法自後將祀必先申明此詔而法官讞獄終以會赦多所寬貸臣僚建言謂惠姦失詔旨故復有是詔帝尤惡人告訐陰事時有人密上書疏過又數按人赦前事者翰林學士張方平御史呂誨

皆以為言乃下詔曰比者中外多上章言人過失暴揚
難驗之罪告按無證之辭或外託公言內緣私忿詆欺
曖昧苟陷善良又赦令者所以與天下更始而有司多
舉按赦前事殆非信命令重刑罰使人灑心自新之意
也自今有上章告人罪言赦前事者訊之慶厯三年既
䟽理天下繫囚因詔諸路配隸役人並皆釋放神宗大
赦凡十一曲赦如之即位詔曰夫赦令國之大恩所以
蕩滌瑕穢納於自新之地是以聖主重焉中外臣僚多

以赦前事据撫吏民興起獄訟苟有誣誤咸不自安甚非持心近厚之誼使吾號令不信於天下其申詔内外

言事按察官司毋得依前舉劾具案取旨否則科違制

之罪

按宋史刑法志載是詔亦作仁宗今從文獻通考改正知諫院司馬光上言按察之官以赦前事

興獄禁之誠為大善至於言事之官本以繩按百辟糾撻姦邪之狀固非一日所為國家素尚寬仁數下赦令或一歲之間至于再三若赦前之事皆不得言則其可言者無幾萬一有姦邪之臣朝廷不知誤如進用御史欲言則違今日之詔若其不言則陛下何從知之臣恐因此言者得以藉口偷安奸邪得以放心不懼此乃人臣之至幸非國家之長利也請追改前詔刊去言事二字光論至再帝諭以言者好以赦前事誣人光曰若言

之得實誠所欲聞若其不實當
罪言者帝命光送詔於中書
熙寧八年編定廢免人

叙格常赦則郡縣以格叙用凡三期一叙即期未滿而
遇非次赦者亦如之哲宗朝大赦凡八元祐元年門下
省言當官以職事曠墮雖去官不免猶可言至於赦降
大恩與物更始雖劫盜殺人亦蒙寬宥豈可以一事差
失負罪終身今刑部所修不以去官赦降原減條所留
請更刪改從之八年因門下侍郎韓維言詔自今每近
郊赦令刑部大理寺開封府並依常時決遣獄訟不減

日限其情重難釋者別為一等奏斷元符三年中書省
言元祐編勅惟傳習妖教託幻變之術及故盜決河隄
堰不以赦降原減餘犯一再遇非次赦或兩經大禮者
聽從原免元符新勅刪去遂使犯法者無由自新詔依
元祐法徽宗政和五年知興仁府夏竦言諸路奏獄有
因祖父母為人所毆而子孫毆之以致死者並作情理
可憫奏裁多免流配若遇赦則不復奏裁即作鬪殺情
理減等流配是遇赦反為不幸詔自今雖遇赦亦令奏

裁帝在位二十五年凡大赦二十六曲赦十四德音二十七南渡已後紹興歲至四赦刑政紊而恩益濫矣高宗登極赦文不及河東北右僕射李綱言兩路勤王之師為朝廷堅守而恩恤獨遺後復有急何以使人帝嘉納之是年六月皇子生大赦詔特詳焉建炎三年韓世忠執苗傅劉正彥獻俘檻車幾百兩先付大理獄將盡尸諸市大理少卿王衣奏曰此曹在律當誅顧其中婦女有僱買及擄掠以從者帝矍然曰朕慮不及此即詔

自傅正彥妻子外皆釋之自祖宗已來赦書節文凡官
典犯枉法贓者皆在不原而積久弊生漸行弛縱紹興
二十五年右正言凌哲言陛下深念比年臣僚有緣誣
告不測之罪投竄遐裔無路自明廼因郊祀赦曠然與
之昭雪或疏罪籍或復原官甚盛德也至於姦賊狼籍
已經按治蹟狀顯著人所共知者亦復巧飾詞理公肆
誕謾咸以違忤權臣為辭今陛下開公正之路小人
乃欲啟僥倖之門此正清議所不容也又況此曹嗜利

與生俱生未易悛革倘復齒仕途益務培植其害將有甚於前日者請特詔有司應自今陳雪過名之人並須檢會元犯事因如係贓罪已經勘劾者乞止依元斷條法施行詔如所請孝宗淳熙九年大理卿王尚之言近以民間詞訴官司按劾多有連及赦前事者復送有司根勘如此則與不曾經赦何異非所以示信也詔應所犯在大赦前者苟非惡逆以上並不許推究光宗紹熙二年勅赦文與令甲抵牾者飭省部逐一比照見行條

法務在從寬毋引法以沮赦五年九月

時寧宗已即位

尚書省

契勘一歲之間三行赦放恐有兇惡累犯之人指恩作孽內曾犯徒流罪已經登極赦恩免後再犯以情理深重者別聽朝廷指揮其指揮與赦文同降但以白紙連書於黃牒前蓋前所未有也開禧三年平吳曦家屬應緣坐其幼男女妾特宥從遠徙理宗每歲大暑必臨軒慮囚自謀殺故殺鬪殺已殺人者偽造符印會子放火官員犯入已贓將校軍人犯枉法自餘死罪情輕者降

從流流降從徒徒杖杖以下釋放大寒或祈晴雪亦如之有一歲凡數䟽決者後以建康為先朝駐蹕之地罪人亦得視臨安減降之法淳祐三年臣僚奏乞今後疎決先期降旨下臨安府三衙應犯罪在指揮前許引用恩赦如指揮後有犯雖已停決不在原減之數其合引赦人不許於停決前輕行斷遣如或違戾並從故出入人罪條制施行詔令刑部詳度上尚書省

遼太祖五年皇弟埒克達喇伊德實安圖謀反安圖妻

訥默庫知之以告得實帝不忍誅乃與諸弟登山刑牲
告天地為誓而赦其罪出埒克為德呼勒部額爾奇木
封訥默庫為晉國夫人八年于古凌部人塔勒滿執逆
黨布呼雅爾堅等十七人來獻帝親鞫之辭多連宗室
及有脅從者乃杖殺首惡布呼餘並原釋裕悅實魯之
子華格屢蓄奸謀帝每優容之而反覆不悛召父老羣
臣正其罪所鞫逆黨三百餘人獄既具帝以人命至重
死不及生賜宴一日隨其平生之好使為之酒酣或歌

或舞或戲射角觥各極其意明日乃以輕重論刑首惡
埒克次達喇帝猶弟之不忍寘法杖而釋之以伊德實
安圖性本庸弱為埒克所使伊德實妻尼嚕古脅從安
圖妻訥默庫嘗有忠告並免天贊三年二月徇幽薊地
詔改元赦軍前殊死已下罪囚自後平渤海始即位凡
兩肆大赦焉會同已後大赦曲赦之典不可枚舉大約
嗣位改元上尊號皇子生及舉柴冊再生之禮則行太
宗初邊將奏破吐谷渾擒其長詔止除首惡餘並赦世

宗時耶律吼有定策功加採訪使益以寶貨辭曰臣位已高敢復求富臣從弟達魯諸子坐事籍沒陛下哀而赦之臣受賜多矣帝曰吼舍重賞而請赦族人賢矣從之趙王喜隱應歷中謀反事覺帝臨問有狀以親釋之未幾復反下獄景宗即位聞有赦自脫其械而朝帝怒曰汝罪人何得擅離禁所詔誅守者復寘於獄及改元保寧乃宥其罪道宗在位歲久又性溺浮屠故赦特煩數然終遼之世如天祿時之以公主額伯哩自死獄中

重熙時之以樞密使蕭孝忠薨開泰寺鑄銀佛像成皆
曲行赦令尤為不經蓋無取焉

金太祖天輔七年二月詔安巴貝勒曰郡縣今皆撫定
有逃散未降者已釋其罪更宜招諭之太宗即位大赦
中外天會十年十月以天清節大赦熙宗而後即位改
元及山陵事畢祔廟禮成則特舉大赦郊恩惟世宗朝
一行之其他水旱災變亦時行曲赦焉大定二年詔前
戶部尚書梁球等安撫山東百姓招諭盜賊凡避賦役

在他所者並令歸業無問罪名輕重悉與原免三年詔吏犯贓罪雖會赦不叙五年日者孫邦榮告西京留守壽王京謀逆鞫實特免死杖之除名嵐州安置既而其兄德州防禦使文復謀反免其緣坐仍以資產賜其兄之子約爾珠十七年詔海陵時大臣無辜被戮家屬籍沒者並釋為良章宗承安四年監察御史姬端修以妄言下吏詔赦其罪令居家俟命宣宗貞祐元年元帥右監軍珠赫果勒齊戰敗以兵殺呼沙呼於其第詣闕待

罪赦之三年赦富察齊勤脅從之黨四年山東行帥府
事蒙古綱言楊安兒黨內有故溜王習顯故留守摩囉
等家奴不在赦原據險作亂至今未息民多歸之乞普
賜恩宥帝命赦之仍贖為良興定元年伊喇瑪努勒言
朶山賊魚張二等嘗屢詔免罪若悉誅之恐乖恩信且
其親屬淪落宋境近在均州或相構亂乞貸其死徙之
歸德睢陳均許間為便詔許之四年有誣宗室從坦殺
人者太學生馬肩龍上書言從坦有將帥材少出其右

者臣無益於用願代死帝問汝與從坦交厚乎對曰臣知有從坦從坦未嘗知臣臣以死明其冤耳遂宥從坦元光元年八月丁丑以彗星見改元大赦諭宰臣曰赦書已頒時刻之間人命所係其令將命者速往剋期而至哀宗正大二年陳和尚隨其兄色埒在軍中以事笞萬宜翁宜翁憤死語其妻必報妻以故殺訴臺省不直則積薪將自焚和尚繫獄者十有八月色埒入朝帝諭以欲赦之意尋以臺諫言復止及聞色埒卒始馳赦之

且諭曰有司奏汝以私忿殺人汝兄死失吾一名將今以汝兄故曲法赦汝天下必有議我者他日汝奮發立功名始以吾為不妄赦矣和尚且泣且拜後死節於鉤州

元太宗初中原甫定民多誤觸禁網而國法無赦令耶律楚材議請赦宥衆以為迂楚材獨從容為帝言詔自庚寅正月朔日前事勿治世祖混一區寓以天下獄囚滋多至元十年勅諸路自死罪以下縱遣歸家期秋八

月悉來京師聽決囚如期至帝惻然憐之盡原其罪二十一年春冊上尊號議大赦天下參知政事張雄飛諫曰古人言無赦之國其刑必平赦者不平之政也聖明在上豈宜數赦帝嘉納之止降輕刑之詔時始定刑制條格開載諸疑獄在禁五年已上不能明者遇赦釋免諸盜賊聞赦故殺捕盜之人者不赦其先竊後強會赦惟下手殺傷事主者不赦餘仍刺而釋之諸流囚中途遭亂而逃不再犯及已老病并會赦者釋之若奉旨流

遠雖會赦非奏請不得放還諸應徒流未行及已行未至者會赦並釋之諸囚徒配役役所停罷者會赦免放元貞而後肆眚之典亦代行之其詔書節目除謀殺祖父母父母妻妾殺夫奴僕殺主謀故殺人但犯強盜印造偽鈔蠱毒魘魅犯上者不赦外其餘罪無輕重悉予原免仁宗即位興聖太后既受尊號廷臣請因肆赦翰林直學士元明善曰數赦非善人之福宥過可也英宗至治元年帝享太廟廷臣或言祀事畢宜赦天下帝諭

之曰恩可常施赦不可屢下使殺人獲免則死者何辜
遂命中書陳便宜行之順帝至正四年蓋苗為刑部尚
書初盜殺河南省憲官延坐五百餘家已有詔除首罪
外餘從原宥至是宰臣追復欲盡誅戮苗堅持不可御
史趣具獄苗曰肆赦復殺在法所無御史獨宜劾苗其
敢累朝廷之寬仁乎卒用苗議罷之

明制凡有大慶及災異皆赦然有常赦有不赦有特赦
十惡及故犯者不赦律文曰赦書臨時定罪名特免或

降減從輕者不在此限十惡中不睦又在會赦原宥之
例此則不赦者亦得原若傳旨肆赦不別定罪名者則
仍依常赦不原之律太祖置政平訟理二禳其無罪應
釋者持政平禳宣德意遣之洪武二十年左都御史詹
徽言軍人有犯當杖其人當兩得罪而免宜并論前罪
誅之帝曰前罪既有復論之則不信矣命如律沅陵知
縣張傑當輸作自陳母賀當元季亂離守節今年老失
養帝謂可勵俗特赦之令傑終養給事中彭興民坐繫

其父上表訴哀立釋之且免囚繫十七人都察院當囚死者二十四人命羣臣鞠有寃者減數人死真州民十八人謀不軌戮之而釋其母子當連坐者建文帝即位盡釋刺面軍及囚徒還鄉里成祖永樂元年縣令以賊戍擊鼓陳狀帝為下法司其人言實受賊年老昏眊所致惟上哀憫帝以其歸誠屈法宥之二年江浦知縣周益以罪當刑妻梅訴益母老無養請代死帝憫而宥益成化十三年河東知縣徐孚坐妖言事相類故不具載

五年八月錄囚雜犯死罪

減等流以下釋之八年二月皇太子錄囚奏貫雜犯死
罪已下報可仁宗立赦條三十五皆學士楊士奇代草
盡除永樂年間弊政厯代因之凡先朝不便於民者皆
援遺詔或登極詔革除之凡以赦前事告言人罪者即
坐以所告者罪宣宗寬詔歲下閱囚屢放遣有至三千
人者諭刑官曰吾慮其瘐死故寬貸之非常制也即位
之初即特赦建文奸黨族屬還家仍以其田產給之英
宗正統十一年大理鄉俞士悅以鬪毆殺人之類百餘

人奏聞請宥俱減死戍邊景帝景泰中陽穀主簿馬彥斌當斬其子震請代死特宥彥斌編震充邊衛軍舊例竊盜赦後三犯者絞英宗詔通叙前後不論赦

具刑制雜議等

篇至憲宗時都御史李秉援舊制奏革既而南京盜王

阿童五犯皆遇赦免帝聞之詔仍以赦前後三犯為令

至神宗朝復議奏請改遣帝自初即位勅三法司中外文武羣臣除

贓罪外所犯罪名紀錄在官者悉予湔滌其後歲以為

常成化元年詔釋戍邊陳循江淵俞士悅並王文于謙

子壻回籍孝宗初立免應決死罪四十八人世宗雖屢
停刑尤慎無赦嘉靖四十一年三殿成羣臣請頒赦帝
曰赦乃小人之幸不允穆宗登極大學士徐階緣帝意
為遺詔盡還諸逐臣優恤死亡縱釋幽繫讀詔書者無
不歎息神宗萬厯四年勅雜犯死罪准徒五年者並兩
犯徒律應總徒四年者各減一年其他徒流等罪皆減
等笞杖放免十二年御史屠叔明請釋革除忠臣外親
命自齊黃外方孝孺等連及者俱豁莊烈帝崇禎十

三年御史魏景琦論囚西市御史高欽舜工部郎中胡璉等十五人將斬忽中官本清銜命馳免因釋十一人熟審始於永樂二年止決遣輕罪命出獄聽候而已尋寬及徒流已下宣德二年五六月連諭三法司錄上繫囚罪狀凡決遣二千八百餘人七年二月親閱法司所進繫囚罪狀決遣千餘人減等輸納春審自此始六月又以炎暑命自實犯死罪外悉早發遣且馳諭中外刑獄悉如之成化時熟審始有重罪矜疑輕罪減等枷

號疎放諸例嘉靖十年令每年熟審並五年審錄之期
雜犯死罪准徒五年者皆減一年二十三年因刑科羅
崇奎言詔五六月間答罪應釋放徒罪應減等者亦如
成化時欽恤枷號例暫與蠲免至六月終止南法司亦
如之四十三年定坐贓不及百兩產絕者免監追隆慶
五年令贓銀止十兩以上監久產絕或身故者熟審免
追釋其家屬萬歷四年詔諸贓犯除侵盜官錢糧五十
兩糧一百石以上者照舊監追如還官銀不足五十兩

并入官給主百兩已上各贓監追至五年或正犯身故逮及子孫勘無家產者俱許審實具奏開豁其各處查盤坐贓追賠銀兩草束亦聽查勘具奏裁奪歷朝無寒審之制惟宣德四年十月以皇太子千秋節減雜犯死罪已下宥笞杖枷鐐者復以天氣沍寒勅南北刑官悉錄繫囚以聞不分輕重至崇禎十年以代州知州郭正中疏請命所司求故事尚書鄭三俊乃引祖宗數事以聞帝納其言

禁屠殺贖生附

唐

五代

宋

遼

金

元

明

唐憲宗元和九年詔如聞比來京兆府每及臘日府縣捕養狐兔以充進獻深乖道理既違天性又勞人力自今已後宜並停文宗寶曆二年即位制書節文應緣田獵鷹鷂獸犬等並宜放除五坊加配諸道鷹鷂等長慶已來嘗進外宣索自今一切停進太和二年帝召對侍講學士許康佐語及取蚘蛇膽知生割腹而後得之遂命停減桂賀等州額貢四年詔曰時屬陽和命禁麝卵

所以保滋懷生仁遂物性如聞京畿及關輔近地豪家
弋獵放縱鷹犬頗傷田苗長吏切加禁察違者捕繫以
聞開成二年三月詔曰韶陽御辰生氣方盛思全物類
以順天時內外五坊凡有籠養鷹鷄及雞鴨鳥雀狐兔
等悉宜放之起今月一日至五月十三日禁京城及畿
內採捕鳥獸羅網水蟲以遂生成永為定制委臺府及
本司切加禁止

後唐明宗長興二年詔五坊見在鷹隼之類並可就山

林解放今後不許進獻三年五月勅春夏之交長育是
務眷彼含靈之類方資亭育之功自此至冬初凡羅網
及諸弋獵之具並宜止絕如有違犯仰隨處官吏便科
違詔之罪起今後每年至於二月初便依此勅曉示中
外四年回鶻進白鶻一聯命禮賓使解縹放之山林
周太祖廣順二年鳳翔言義州蕃部買牛入蕃多是宰
殺乞止絕沿路州縣道途百姓不得殺牛貨賣與蕃人
從之

宋真宗景德三年詔牛羊司畜有孳乳者放牧勿殺大中祥符二年詔量留五坊鷹鷂備諸王從時展禮餘悉縱之三年禁方春射獵每歲春夏所在長吏申明此旨天禧四年判杭州王欽若奏以西湖為放生池禁捕魚鳥仁宗嘗夜飢思膳燒羊恐膳夫自此戕賊物命以備不時之需戒勿宣索

遼太宗會同五年五月五日禁屠宰道宗咸雍七年罷獵禁屠殺以置佛骨於招仙浮圖故也


金海陵天德三年命大官常膳惟進魚肉舊貢鵝鴨等
悉罷之並放皇統間苑中所養禽獸正隆五年禁中都
河北山東河南河東京兆軍民網捕禽獸及畜養鵬隼
者世宗大定五年詔曰馬者軍旅所用牛者農耕之資
殺牛有禁馬亦何殊其令禁之十四年詔明安穆昆之
民不許殺生祈祭二十年帝謂宰相曰女直官多謂朕
食用太儉朕謂不然夫一食多費豈為美事况朕年高
不欲屠宰物命貴為天子能自節約亦不惡也二十五

年帝幸上京平章政事襄奉御平山等射懷孕兔帝怒
令杖平山三十仍召襄誡飭之遂下詔禁射兔十一月
又詔曰豺未祭獸不許採捕冬月雪尺已上不許用網
及蘇克蘇呼恐盡獸類章宗明昌三年正月以孝懿皇
后小祥禁屠宰承安二年七月以壽王洪輝疾愈帝幸
天長觀建普天大醮禁屠宰七日

元世祖至元十二年勅輝和爾地春夏毋獵孕字野獸
申嚴屠牛馬之禁二十七年禁屠宰牝羊成宗元貞三

年詔江南毋捕天鵝大德三年揚州淮安屬縣蝗在地
者為鶯啄食飛者以翅擊死詔禁捕鶯元刑制禁令條
開載每月朔望二弦凡有生之物殺者禁之諸郡縣歲
正月五月各禁宰殺其饑饉去處自朔日為始禁殺三
日自十二月至來歲正月殺牝羊者禁之諸宴會雖達
官殺馬為禮者禁之其有老病不任鞍勒者亦必與衆
驗而後殺諸私宰官馬牛為首杖一百七為從者八十
七助力者減正犯二等論罪

明世宗初即位令縱內苑禽獸天下毋得進獻



欽定續通典卷一百十七